

Sakspapir

Saksnr	Utvalg	Type	Dato
125/20	Formannskapet	PS	22.10.2020
104/20	Kommunestyret	PS	12.11.2020

Saksbehandler	Arkiv	ArkivsakID
Odd Harald Dommersnes	FE-202	20/4646

Økonomireglement

Vedlegg

Økonomireglement Austrheim endelig versjon

Uttale økonomireglement

Framlegg til vedtak:

Austrheim formannskap/kommunestyre vedtek økonomireglement for Austrheim kommune

Formannskapet - 125/20 - 22.10.2020

FS - behandling:

Kommunalsjef Odd Harald Dommersnes orienterte om saka.

Legg opp til å betra driftsresultatet - bygga opp disposisjonsfond - redusera lånegjelda i prosent av brutto driftsinntekter.

Kommunalsjef Dommersnes spurte om det er vanleg i Austrheim å leggja fram rapport etter 3. tertial, ordførar Per Lerøy (Ap) svara at det ikkje har vore vanleg, men har vore etterlyst.

For økonomi viste Dommersnes til at det er avdelingsleiarar som framover må løysa budsjettsprekkar innan sine tenestekområde. Om det er avvik utover dette, så må ein be om auka midlar politisk. Det var ein diskusjon om dette, Dommersnes presiserte at budsjettet er bygd nedanfrå og opp, og at dersom avdelingsleiarar ser at det er behov for meir så må det løysast innanfor den sektoren. Skulle det skje spesielle ting, som at nokon med store behov flyttar til kommunen, så vil administrasjonen gå til politikanane og be om ekstra midlar, og be om ei politisk prioritering på korleis dette skal løysast. Formannskapet vil få månadlege rapporteringar på dette, med rapport og prognosar.

Morten Sognnes (H) sa at dette er noko ein har venta på, og som ein ser fram til. Inger Lise Brekke (H) sa at denne måten å jobba på, gjev avdelingsleiarar eit eigarskap til budsjetta sine.

Anne Dahle Austrheim (KrF) spurte om ein kan setja ein ambisjon på 1,75 prosent driftsoverskot heller 3 prosent, for å ha større handlingsrom. Dommersnes svara at driftsoverskotet skal sikra oppbygging av disposisjonsfond, men at kommunestyret uansett kan endra dette reglementet på kort varsel.

Per Lerøy (Ap) sa at 1,75 prosent som driftsoverskot er eit statleg råd, Fylkesmannens råd er 3

prosent, men kommunestyret er suverene til å seia at i år kan me kjøra med 0 i driftsoverskot. Kommunalsjef Odd Harald Dommersnes sa at det er tilrådeleg å bygga seg opp ein buffer, dersom det til dømes skal investerast i ny Nordliheimen eller liknande.

Morten Sognnes (H) støtta eit mål om 3 prosent driftsoverskot.

Per Lerøy (Ap) sa seg samd med at ein skal vera nøkterne med investeringane framover, og bygga opp fond, men det er viktig å ha med seg at det er kommunestyret som avgjer om det skal vera driftsoverskot på 0 prosent, 1,75 prosent, eller 3 prosent. Her er kommunestyret suverene.

Handsaming i formannskapet:

Samrøystes for rådmannens framlegg til vedtak.

FS - vedtak:

Austrheim formannskap rår kommunestyret til å vedta økonomireglement for Austrheim kommune.

Kommunestyret - 104/20 - 12.11.2020

KS - behandling:

Kommunalsjef økonomi og personal, Odd Harald Dommersnes, orienterte om saka. Det er behov for å vedta eit oppdatert økonomireglement no.

Viste mellom anna til at kommunen framover må bygga seg opp eit disposisjonsfond, for å vera budd på svingingar i inntektene.

Det nye reglementet legg opp til å starta mykje tidlegare med arbeidet med økonomiplan og budsjett, alt frå februar månad. Ei anna endring er at det vert rapportert også etter 3. tertial, og at ein ikkje ventar til årsrekneskapen er klar etter nyttår.

Britt Skaalevik Lerøy (Ap) spurte om når det skal rapporterast internt månad for månad, og om dette er fastsett. Kommunalsjef Dommersnes svara at dette er fastsett til andre tysdag i månaden.

Handsaming i kommunestyret:

Samrøystes for rådmannens framlegg til vedtak.

KS - vedtak:

Austrheim kommunestyre vedtek økonomireglement for Austrheim kommune.

Saksopplysninger:

Bakgrunn

Føremål

Økonomireglementet skildrar kommunen sine overordna prinsipp for økonomisk styring, og korleis kommunen skal forvalta ressursane sine gjennom planar og budsjett. Den skal gje retningslinjer for utføring av oppgåver innanfor økonomiområdet i kommunen for å sikra etterleving av relevante føringar for området. Reglementet gjeld for heile organisasjonen.

Overordna rammer/heimel for reglementet

[Lov om kommuner og fylkeskommuner \(Kommuneloven\)](#) (omtalt som Kommunelova)
[Forskrift om økonomiplan, årsbudsjett, årsregnskap og årsberetning for kommuner og fylkeskommuner mv.](#) (omtalt som Forskrifta)
[Forskrift om rapportering frå kommunar og fylkeskommunar](#) [Forskrift om kommunalt rapporteringsregister \(KOR\)](#) [Forskrift om kommunale og fylkeskommunale garantiar](#)
[Forskrift om kommunar og fylkeskommunar sin finans- og gjeldsforvaltning](#) [Lov om offentlige anskaffelser](#)
[Forskrift om offentlige anskaffelser](#)

Dersom det skjer endringar i lov, forskrift eller avgjerder om korleis desse skal tolkast, vil alltid lov og forskrift har rang før reglementet

Målsetting med økonomistyringa

Kommunen skal ha økonomisk berekraft slik at innbyggjarane kan få stabile og gode velferdstenester på kort og lang sikt.

Økonomistyring

Kommunen skal forvalta økonomien på ein berekraftig måte slik at den økonomiske handlefridomen blir varetatt over tid. For å ta vare på prinsippet om langsiktig økonomisk styring, bør tiltak av varig karakter innførast i samband med budsjett- og økonomiplanprosessen. Dersom ein likevel ynskjer å sette i verk tiltak av varig karakter utanfor budsjettprosessen, og det ikkje kan finansierast innafor sitt budsjettområde, skal rådmannen godkjenna tiltaket eller vurdere om det må handsamast politisk før det vert sett i verk.

Kommunen sine langsiktige utgifter skal vera finansiert av langsiktige inntekter. Dette inneber at tiltak av varig karakter som blir sett i verk må ha langsiktig budsjettdekning. Tiltak som berre gjeld innanfor ein avgrensa tidsperiode kan bli finansiert med inntekter som ikkje er varige, eller av fondsmidlar.

Konklusjon

Austrheim Kommune skal vedta nytt økonomireglement . Rådmannen sitt framlegg til dette ligg i vedlegget «økonomireglement for Austrheim Kommune».